

दिनांक : 12.09.2026

समय : 18.45 बजे

- ब्रिक्स सदस्य देश सगळां री एक राय ऊं नई दिल्ली घोषणा पत्र अपनायो—प्रधानमंत्री नरेन्द्र मोदी भारत कानी ऊं ब्रिक्स री सदस्य ने जन केन्द्रित बतायी।
- प्रदेश मांय व्ह्या नगरीय निकाय चुनाव मांय हाल ताई रा सब ऊं बत्ता करीब 73 फीसदी वोट पड्या।
- राज्य मांय बारिश रो नुवो दौर सरु व्ह्यो— 16 सितम्बर ताई बिरखा चालती रेहवण रा आसार।
- प्रदेश मांय गणेश महोत्सव रो उमाव अर भक्ति रो माहौल—लोकदेवता बाबा रामदेव रो मेळो ई काल सरु व्हेला।

000

ब्रिक्स शिखर सम्मेलन 2026 रा पहला ही दिन आज ब्रिक्स सदस्य देश एक राय ऊं नई दिल्ली घोषणापत्र अपना लीनो। प्रधानमंत्री नरेन्द्र मोदी ओ घोषणापत्र अपनावण रो प्रस्ताव पेश कीनो हो। सम्मेलन रा समापन भाषण मांय प्रधानमंत्री मोदी कह्यो के ओ घोषणा पत्र सदस्य देशां रा भेळा संकल्प री साफ दिशा बतावे है। वे कह्यो के आं संकल्पां ने नतीजा मांय बदलण री सगळां री भेळी जिम्मेदारी है।

-----

नई दिल्ली रा भारत मंडपम् मांय राख्यी ज्या ब्रिक्स शिखर सम्मेलन मांय प्रधानमंत्री मोदी कह्यो के बदलती दुनिया ने जूना संस्थानां ऊं नी चलायी जा सके है। वे नुमाइन्दगी, जवाबदेही अर नियम बणावण रा काम मांय सुधार माथे जोर दीनो। श्री मोदी कह्यो के आवता बगत री प्रौद्योगिकी अर वां ने काबू करण वाळा नियमां मांय ग्लोबल साउथ देशां री बराबर भागीदारी व्हेवणी चाहिजे। इण ऊं पैली सत्र सत्र रा उद्घाटन भाषण मांय श्री मोदी ब्रिक्स निरंतरता अर कार्यान्वयन तंत्र रो प्रस्ताव पेश कीनो। वे कह्यो के ओ तंत्र तीन पक्षां रा ट्रोइका रे जरिये सगळी पहलां अर नतीजां री निगराणी कर सकेला। प्रधानमंत्री भारत री अगुवाई वाळा ई ब्रिक्स शिखर सम्मेलन ने ऐतिहासिक उपलब्धि बतायो। वे कह्यो के ब्रिक्स समूह री भारत री सदस्य जन केन्द्रित अर मानवता प्रथम रा नजरियां माथे आधारित है। श्री मोदी कह्यो के लचीलापन, नवाचार, सहयोग अर स्थिरता माथे भारत रो सब ऊं बत्तो ध्यान है।

000

केन्द्रीय विधि अर न्याय मंत्री अर्जुन राम मेघवाल आज नई दिल्ली मांय इंस्टीट्यूट ऑफ चार्टर्ड एकाउंटेंट्स ऑफ इण्डिया — आई.सी.ए.आई रा दीक्षांत समारोह मांय शामिल व्ह्या। देशभर मांय 23 ठौड़ां राख्यी ज्या ई कार्यक्रम मांय नुवा चार्टर्ड अकाउंटेंट्स ने इंस्टीट्यूट री सदस्यता रा सर्टिफिकेट दिया ज्या। ई मौके मेघवाल कह्यो के लारला कुछ बरसा मांय एक हजार सात सौ ऊं बत्ता जूना अर बेकार कानून खत्म करी ज्या, जिण ऊं ईज ऑफ लिविंग सागे विश्वास आधारित शासन ने नुवी गति मिली है।

000

मुख्य सचिव वी. श्रीनिवास हाल ही मांय व्ह्या नगरीय निकाय चुनाव मांय प्रदेश मांय हाल ताई रा सब ऊं बत्ता मतदान प्रतिशत माथे खुशी जतायी है। वे आज राज्य निर्वाचन आयुक्त राजेश्वर सिंह सागे मुलाकात कर र आ उपलब्धि हासिल करण सारु वां ने बधाई देता थकां राज्य निर्वाचन आयोग री कोशिशों री सराहवणा कीनी। राज्य रा 309 नगरीय निकायां मांय दो दौर मांय पड्या वोटों रा तैत करीब 73 फीसदी मतदाता वां रो मत दीनो। सब ऊं बत्ता 91 दशमलव पांच नौ फीसदी वोट बालोतरा जिला री धोरीमन्ना नगरपालिका मांय पड्या। हनुमानगढ़ जिला री गोलूवाला नगरपालिका मांय ई 90 फीसदी मतदान व्ह्यो। ई बीचे वोटों री गिणती रो काम आसानी ऊं अर साफगोई सागे करावण सारु सगळी जरूरी तैयारियां करी जा रही है। वोटों री 14 सितम्बर ने व्हेवण वाळी गिणती सारु पर्यवेक्षकां अर गणना सहायकां ने सिखावण दी जा रही है।

000

रूस मांय चाल रह्या अंतर्राष्ट्रीय युवा महोत्सव मांय ब्यावर री एश्वर्या यादव भारत री ओर ऊं शामिल व्हे रही है। येकातेरिनबर्ग मांय व्हे रह्यो अंतर्राष्ट्रीय युवा महोत्सव 17 सितम्बर ताई चालेला। ई दौरान एश्वर्या वाद—विवाद समेत न्यारा—न्यारा मुद्दां माथे चर्चा सागे शैक्षणिक अर सांस्कृतिक कार्यक्रमां मांय भारत री नुमाइन्दगी करेला।

000

राज्य मांय बिरखा रो नुवो दौर सरू व्हे ग्यो है। मौसम विभाग आज केई ज़िला मांय बरसात रो येलो अलर्ट जारी कीनो है। काल ई अजमेर, अलवर, बांसवाड़ा, डूंगरपुर, बाड़मेर, बालोतरा, भरतपुर अर भीलवाड़ा समेत 29 ज़िलां मांय गरज सागे बारिश रा आसार है। ई बीचे जोधपुर, उदयपुर, भरतपुर, कोटा, अजमेर, पाली, बारां, बीकानेर, सवाईमाधोपुर अर चित्तौड़गढ़ समेत केई ज़िलां मांय जोरदार बायरो बाजण सागे मेह बरस्यो। कोटपूतली-बहरोड़ ज़िला रा विराटनगर अर पावटा मांय आज कुछ देर ताई झमाझम मेह व्ह्यो, जद के सलूमबर मांय सीळो बायरो बाजण सागे थोड़ी देर ताई फुहारां पड़ी। बरसात व्हेवण ऊँ उमस ऊँ साता मिली है। बिरखा रो दौर 16 सितम्बर ताई चालबा रा आसार है। जयपुर, भरतपुर, कोटा अर उदयपुर संभाग मांय हल्की ऊँ मझला दर्जा री बिरखा व्हे सके है। उदयपुर संभाग अर आरे-सारे रो हलकां मांय ई कटे-कटे जोरदार बरसात री संभावना है। बिरखा ने ध्यान राखता थकां किसानां ने साखां ने भिजबा ऊँ बचावण सारू जरूरी जतन करण री राय दीरीजी है। जल संसाधन विभाग रे मुजब प्रदेश मांय हाल ताई डींग अर धौलपुर ज़िलां मांय ई सामान्य ऊँ बत्तो मेह बरस्यो है। सवाईमाधोपुर, अजमेर, अलवर अर बीकानेर समेत 23 ज़िलां मांय सामान्य जद के जयपुर अर उदयपुर समेत 15 ज़िलां मांय सामान्य ऊँ कम पाणी बरस्यो है। हाल ताई सब ऊँ कम बरसात पाली ज़िला मांय व्ही है।

000

प्रदेश मांय किडनी री बीमारियां रा मरीजां ने ईलाज रा आसान अर मुफ़्त सुबीता मुहैया करावण सारू लगातार कोशिशां करी जा रही है। मरीजां ने टेमसर नज़दीकी अस्पताल मांय डायलिसिस रो सुबीतो मुहैया करावण सारू सरकारी संस्थानां सागे जनता री भागीदारी ऊँ इण ऊँ जुड़ी सेवावां ने मजबूत बणायी जा रही है। और ब्यौरो समाचार डेस्क ऊँ —

000

प्रदेश मांय गणेश चौथ अर गणेश महोत्सव रो उमाव निजर आवण लाग्यो है। इण ने ध्यान राखता थकां गणेश जी रा मिन्दरां मांय सोहवणी सजावट अर रोशनी करी जा रही है। न्यारी-न्यारी ठौड़ां गणेश जी री पर्यावरण अनुकूल मूर्तियां सजाई जा रही है। गणपति बप्पा रा स्वागत सारू पांडाल सजाया जा रह्या है अर हलवाई मोदक बणावण मांय लाग्योड़ा है। गणेश चौथ 14 सितम्बर ने मनायी जावेला। ई मौके राजधानी जयपुर रा नामी मोती डूंगरी गणेश मंदिर मांय मोदक री सोहवणी झांकी सजाई जा रही है। ई बीचे सवाईमाधोपुर रो रणथम्भौर त्रिनैत्र गणेश मेळो आज झण्डो फहरावण री रीत सागे सरू व्ह्यो। तीन दिन रा ई मेळा मांय मोटी तादाद मांय जातरू पूग रह्या है। झुंझुनूं ज़िला रा चिड़ावा अर सलूमबर ज़िला रा सराड़ा मंदिर समेत केई ठौड़ां गणेश महोत्सव राख्यी ज्या है। दूजी कानी लोकदेवता बाबा रामदेव रो मेळो काल सरू व्हेला। जैसलमेर ज़िला मांय बाबा री समाधि री ठौड़ रामदेवरा मांय मंगला आरती सागे मेळा री सरूआत व्हेला। मेळा मांय आखा देश ऊँ आ रह्या जातरूआं री मोटी तादाद ने ध्यान राखता थकां प्रशासन अर पुलिस जरूरी तैयारियां कीनी है। वठे हिफाजत रा पुख्ता बन्दोबस्त सागे असरदार निगराणी सारू सी.सी.टी.वी. कैमरा ई लगायी ज्या है। बाड़मेर ज़िला मांय शिव हलका रा रामदेरिया गांव मांय अवतार धाम मांय काल भादवो मेळो सरू व्हेला। पाली ज़िला रा घूमटी मांय बाबा रामदेव रो भादवो मेळो ई काल भरेला।

000